



39170

Mag. St. Dr. P

Teol. 3036

*Moresiæ Martinicæ Inauguratio doctora-
nalis, in qua potissimum de Lutheri
doctoratu et Lutheranicis doctoribus
dissertitur.*

Craus. in off. Nicol. Lobii 1610,

Biblioteka Jagiellońska



stdr0002232

INAVGVratio DOCTORALIS

REVERENDI ET CLARISSIMI
DOMINI
MARTINI MORESCII
POLONI.

In qua

Potissimum de Lutheri Doctoratu, & Lu-
theranis Doctoribus disseritur.

CELEBRATA

IN CELEBERRIMA JNGOLSTADIENSI
ACADEMIA ANNO REDEMPTORIS, M. DC. IX.
Kalendis Septembr. & IV. Nonas eiusdem Mensis.

Promotore

R. P. IACOBO GRETSERO SOCIETATIS IESV,
SS. THEOLOGIE DOCTORE PROFESSO-
RE, ET PRO TEMPORE COLLEGII THEO-
LOGICI DECANO.

CRACOVIAE,

In officina, NICOLAI LOBII,
Domini, M. DC. X.



CONTEMNIT TVTA
PROCELLAS:



VTRIQVE PORTAN8 COM
MERCIA MVNDO.

39170
I

ILLVSTRISSIMO DOMINO, ET
PATRI IN CHRISTO REVERENDISS:

D. A N D R E Æ

A B N I N

O P A L I N S K I,

D. G. EPISCOPO POSNANIENSI,

Domino clementissimo:

Martinus Moreseius S. T. D. felicitatem.

CUm illustre C. U. nomen Reu^{me} Presul D. D.
clementissime, nisi in exteris regionibus, cen
beneficum aliquod sydus preluxisset: illius
splendore ac dignitate insigne honoris mei ex studio The-
ologico collecti ornandum & illustrandum putavi. In
quam mentem impulit me voluntas C. U. nisi antea in
The^{sibus} nomini C. U. inscriptis, benignè acceptis, de-
clarata, ut non solum initia & quasi fundamenta hono-
ris mei sub auspiciis C. U. iacta esse vellem, sed etiam to-
tius negocij absolutionem Illustri nomini C. U. adscri-
berem. Quem enim alium Patronum ornamentorum
meorum quererem, præter C. U. cuius singularem bene-
uolentiam erga me meaq; perspectam habui, aut cui stu-
dium meum ad amplificationem cultus diuini promptum
offerrem, quam Episcopo meo, cuius Ecclesiæ ut aliquan-

Præfatio.

tula opera mea utilis esse posset, semper post meam ad
sacra ministeria consecrationem, omni ope & contenti-
one allaboravi. Testis est huius mee voluntatis Inau-
guratio mea, quam ideo C. U. offero, ut sub cuius Pa-
trocinio Doctrinæ in sacris literis honorem sum adeptus,
ei quoque omnes ingenij & doctrinæ alicuius mee fru-
ctus, quoscumq; tenuitas mea proferet, consecrentur.
Accipiet C. U. hanc deuoti animi significationem opti-
mo animo, ac me qui semper in potestate C. U. esse volo
patrocinio suo tuebitur. Deum Opt: Max: oro, ve-
lit diuturnitate & felicitate administrationis Ecclesie
C. U. commisse, à Cel: U. omnes Predecessores esse su-
peratos.

P R Æ F A T I O
P R O M O T O R I S
I N V E S P E R T I N A M
D I S P U T A T I O N E M
K A L E N D : S E P T E M B :
M . D C . I X .

Cogitanti mihi, admodum *Reuerende & Magnifice Domine Rector, Illustræ, atq; Generosi Domini Comites, & Barones, Patres Academicæ amplissimi, ceteriq; Auditores virtute, & doctrinæ ornatissimi*, quid huic hodiernæ, & cras, volente Deo, futuræ Doctorali celebritati præfationis loco præmitterem, occurrit illa quæstio; num Lutherus fuerit Doctor Theologiæ? Nam quid convenientius huic nostro Doctoreo Actui, quàm sermo de Doctoribus? Quid aptius muneri meo, qui totum ferme otium; oleum, & operam; calamum, & stylum in controuersis fidei consumo; quàm, vt loquar de Luthero, qui hac ætate omnium contentionum primus fons, & prima origo fuit. Disquiram igitur, non tantum hodie, sed & crastina luce, num Lutherus fuerit Doctor Theologus.

Cogitabit fortè quis, me clara, imò solis radiis dilucidiora in dubium vocare, eademq; operâ quærere posse; num duo sint paria; tria, imparia? &, num sol meridie luceat. Quid enim notius? quid sermone omnium, præsertim Lutheranorum; & ipsius etiam Lutheri ore tritius? quàm Doctor Luther; Doctor Martinus Lutherus? Vix vllum Lutheri tractatulum inuenies, cui Doctoris titulus non præfigatur. Quid ergò opus, nunc demum post tot annos anxie inquirere, num Lutherus fuerit Doctor?

Animis tamen, & auribus adeste, cæptisq; fauete, optimi Auditores; efficiam, vt intelligatis, me hoc argumentum temerè non suscepisse. Probabo hoc præloquio, & crastina oratione, Lutherum non fuisse Doctorem. Detraham corniculæ non Æsopicæ, sed Islebicæ alienas plumas, nomina & insignia Doctoralia; pileum, zonam,

zonam, annulum, epomidem: de cathedra Doctorali furcillis stramentitium Doctorem deturbabo; vel potius iam pridem deturbatum demonstrabo. Nunc rem ipsam aggredior.

Statuit Lutherus in libro de *Reformatione Reipublicæ Christianæ ad nobilitatem Germanicam*, duplices Doctores Theologos. Alios, qui sint Doctores Sacræ Scripturæ, seu sacrarum literarum. Alios, qui sint Doctores *Sententiarum*, seu *Scholastica Theologiæ*. Lutherum prioris generis Doctorem non fuisse, manifestè probo ex citato libro Lutheri de *Reformatione Reipublicæ*. Doctor Sacræ Scripturæ nec fit, nec promouetur nisi à solo Spiritu sancto: hic solus est inaugurator, & huius Doctoratus largitor. Ita enim scribit ibidem Lutherus: *Doctores Artium, Medicinæ, Iuris, sententiarum, creari possunt à Papa, Imperatore, & Academiis. Doctorem verò Sacræ Scripturæ nemo facit, nisi Spiritus sanctus.* Sed Lutherus nunquam à Spiritu sancto creatus est Doctor Sacræ Scripturæ. Nec est igitur, neq; fuit Lutherus Doctor Sacræ Scripturæ. Nam, si Lutherus unquam à Spiritu sancto Doctor sacrarum literarum renunciatus est; dicat nobis, obsecro, locum huius promotionis; nominet annum, diem: Fortè illo die promotus est, quo Catharinam Borram monialem incestu connubio sibi copulauit? Proferat testes, & testimonia, nam aliàs fidem non inueniet: imò, tanquam falsarius explodetur, & exhibitur. Etenim, qui se fingit Doctorem, cum Doctor non sit, falsarius est, & pœna falsarii plectitur, vt post Bartolum docet Felinus in cap. Quoniam. extra de Magistris.

Deinde, quis promotioni huic interfuit? Quid vltro, citroq; actum & dictum? Quà specie Spiritus sanctus, tantus Promotor, aspectabilem sese exhibuit? Num, vt olim, sub schemate columbæ? Num ignis? Quando Doctorale epulum præbuit Lutherus? & quibus? Num vicem conuiuii huius subiit celeberrima illa merenda, cum Lutherus, vt in Colloquiis sympotiacis Germanicis tit. de *Miscellaneis*, proditum legimus; vitrum trinode vastissimum, & capacissimum, in quo totus Catechismus depictus erat, singulis Merendistis, seu conuiuiis propinavit; propinatumq; semper vno flatu exsiccauit, & ad fundum vsque exinanivit? cur, cum pari hauustu Ioannes Agricola Islebius respondere deberet, primo statim conatu defecit, & vix tertiam Catechismi partem ebibere potuit.

Adhæc, si Lutherus non ab homine, sed à Spiritu sancto in Doctorem Sacræ Scripturæ promotus est, cur perpetim suis in Tomis pro-

mis prouocat ad illum Doctōratum, quem Vuittebergæ publica in schola à Carolstadio acceperat: non ad illum, quem nescio in quo angulo, nescio quo anno, & die à Spiritu sancto adeptus est? Cur priorem illum passim, tanquam legitimum vocationis suæ indicium producit: de hoc autem, qui à longè præstantiore promotore, quàm fuerit Carolstadius, profectus est, penitus silet, vt & alii Prædicantes Lutheri Laudatores, & encomiastæ?

Præterea, si solus sanctus Spiritus facit Doctōres Sacræ Scripturæ: Cur Prædicantes, Lutheri posterī, Doctōres sacrarum literarum ercant? An non quotannis Academiæ, Vuitebergenſis, Lipsienſis, Tubingenſis, tales Doctōres in orbem extrudunt? Cur spiritui sancto suas partes præripiunt? Modestior hac in re fuisse videtur Lutherus; qui creauit & ordinauit duos Episcopos Lutheranos, Merseburgensem, & Naumburgensem: creauit etiam presbyteros, & Diaconos, sed Lutheranos. Doctōrem, quem creauerit, nullum prorsus scio. Non sum planè hospes in Lutheri libris, & Actis: sed non memini me obseruare, vllum à Luthero Theologica laurea insignitum esse; cū tamen gradus Academici antea à Luthero, & Philippo aboliti, aliquot annis ante Lutheri obitum instaurati, & denuò usurpati fuerint. Quæ causa huius rei? Nam nullos fuisse, qui, Luthero ductore & promotore, lauream Doctoralem capessere cuperent, mihi non sit verisimile; cū vel ructum Lutheri audisse, in parte beatitudinis ponerent. Num Lutherus religione absteritus faciem suam in Spiritus sancti messem immittere noluit, eiq; soli officium creandi Doctōres Sacræ Scripturæ relinquendum duxit? Cur ergo non idem factum est à Lutheri symmyſtis & synergis?

Vide orationem. territionem Lutheri in turcicâ R. P. Nicolai Senarij.

Denique Lutherus aut ante Doctōratum Vuittebergæ Anno M. D. XII. acceptum, à Spiritu sancto Doctōr Sacræ Scripturæ creatus fuerat: aut postea. Si antè; iniuriōsissimus fuit Lutherus in sanctum spiritum; quòd laurea eius contentus esse noluerit, & diuinæ illi coronæ, humanam postea superaddiderit. Quid dico humanam; imò Diabolicam: cū, Luthero iudice, laurea Doctoralis ab Academiis conferri consueta, nihil sit aliud, quàm *character bestia Apocalypica*; & corona, qua locustæ ex puteo Tartareo ascendentes, redimitæ fuerunt. Si autem post Doctōratum à Carolstadio acceptum, Doctōr Sacræ Scripturæ à Spiritu sancto creatus est, in periurium incurrit: quia, sub Carolstadio iurauit, se Gradum

Luth. lib. contra falso nominatum ordinem Episcoporum. Et, in lib. contra Catharismum.

Doctorem alibi non resumpturum. Dicet fortè: Hoc iuramentum Academiæ Viitebergenſi præſtitum, ſibi à Spiritu ſancto relaxatum eſſe. At nimis creduli iure cenſeamur; ſi huic aſſertioni absque vilo teſtimonio fidem commodemus. Si tamen vnquam cum Luthero diſpenſatum eſt, crediderim id factum eo die, quo à nexu, & vinculo monaſticorum votorum ita exſolutus, & abſolutus fuit; vt non qualem cunque ſæminam, ſed monialem ſub ſpecioſo conubii titulo ſibi inceſtandam eſſe duxerit. Fortè dicet; iuratum abſe de non reſumendo eiſdem generis Doctore, non de alio, ſpecie prorsus diuerſo, qualis, quem ſanctus Spiritus largitur. Sed Lutherus nondum oſtendit, nec tam citò oſtendet, Doctorem Sacræ Scripturæ, & Doctorem ſententiarum, ſeu Scholaſticæ Theologiæ, tanto diſcrimine ſecerni, quanto à Luthero diſtare ſinguntur.

Sed diſpiciamus, quibus cæleſtis ille Promotor, Spiritus ſanctus, cum promouet, cæremoniis vtatur. Nullis, quia *ſanctus Spiritus*, vt ait Lutherus, *non curat rubrum, aut puniceum pileum: & ſi quid aliud eſt huiusmodi viſum*. Diſcedunt ergo à ſancto Spiritu Lutherani Promotores, qui Doctores ſuis pileos imponunt, & alias cæremonias Catholicis Academiis viſitatas uſurpant: vt ſeſſionem in cathedra; traditionem libri, annuli, complexum & oſculum. Cur hæc, & his ſimilia adhibent, cum non deceant Doctores ſacræ ſcripturæ: ſed, ſententiariorum: quos Papa, Imperator, & Academiæ progenerant.

Gloriatur non ſemel ſuis in tomis Lutherus ſuo Doctoreali *parreto*, ſeu *pyrreto*, ſeu pileo Doctoreali. At quo iure? Nam aut habuit pileum Doctorealem, aut non habuit. ſi habuit: non igitur à Spiritu ſancto Doctor creatus fuit, quia ſpiritus ſanctus Candidatis ſuis, nec rubrum, nec puniceum, nec cæruleum, nec fuluum, nec flauum, nec nigrum, nec album pileum imponit, vt teſtatur ipſe Lutherus. Si autem non habuit: qua fronte de hoc pileo ſibi toties tam ſuauiſter blanditus eſt? Sed, habuerit pileum Doctorealem: cum certè non habuit à Spiritu ſancto: quia ille non vtitur pileo: ſed à Carolſtadio, quando Lutherum adhuc Monachum Doctore ſcholaſtico, ſeu ſententiariorum Viitebergæ inſigniu: hunc tamen ipſum Doctorealem pileum amiſit Lutherus, non tantum per degradationem, de qua ſuo loco; ſed & per ſponſionem quandam, ſeu promiſſionem donandi, & abſe abdicandi Doctorealis pilei; ſi fieret id, quod ipſe putabat non poſſe vnquam fieri. Quod tamen à pluri-

à pluribus, & prius factum fuerat; & postea sæpius factum est. Audite rem mirificam.

Reiecit Lutherus Epistolam S. Iacobi, & *stramineam* nominavit: etiam hac de causa, quod, ut ipse somniabat, aduersa fronte Epistolis S. Pauli aduersaretur: vociferans, neminem vnquã fuisse, esse, vel fore tam peritum artificem, qui Iacobum cum Paulo conciliare posset. *Multis sudarunt*, inquit Lutherus, in Latin. Colloq. titulo, de nouo testamento; in *Epistola Iacobi*, ut eam cum Paulo concordarent: sed minus feliciter. *Sunt enim contraria: fides iustificat; fides non iustificat. Qui hac rectè coniungere poterit, ei vitam meam*, hoc est, pileum Doctorem, imponam, & fatuum me nominari permittam. Significantius hoc ipsum exprimitur in Colloquiis germanicis: *Dem will ich mein Paret auffsetzen / und will mich einen Narren schelten lassen.* O bone Luthere. *Omne promissum cadit in debitum.* Actum est de tuo pileo: & quod hinc sequitur, etiam de tuo Doctoratu. Nam in primis sancti Patres; nominatim S. Augustinus in Psalmum 31. Patres Concilii Tridentini, & omnes Catholici scriptores, facillimè & creberrimè ostenderunt, nullam penitus inter vtrumq; Apostolum esse asymphoniam, & antilogiam. Cedo igitur tuum Doctorem pileum. Redde, quod ex promisso debes: quid restitas? quid tergiversaris? Pileum tuum Catholicorum Doctorum capiti impone. Sed, satis scio; nullus erit ex sanctis Patribus, vel ex Orthodoxis scriptoribus, qui talis fauni & fusciferi pileum suo capiti imponi permittat. Ergo Caluinistis redde promissum pileum. Nam & illis facillima est vtriusque Apostoli conciliatio: nulli enim facilius conciliantur, quàm qui non dissentunt. Sed ægrè sinet Lutherus, ut pileus Doctoralis à suo capite ad capita sacramentaria migret. Redde igitur pileum tuum tuo successorì, Lutherano Hunnio: Nam in Examine contra Illustrissimum Cardinalem Bellarminum disertè scribit, pronam & expeditam esse viam conciliandi cum Paulo Iacobum. Accipe ergo, mi Hunni, tui Lutheri Doctorem pileum: Et hætenus nobis Lutherus Doctor fuerit. Ab hoc certè tempore stultus erit. Hanc enim legem ipsemet sibi dixit: hac conditione nobiscum pactus est. Tametsi, quomodo sponsione amissum Doctorem pileum Hunnio tradet, cum longè ante hanc promissionem pileum suum amiserit, degradatus à Leone X. Pontifice, & à Carolo V. Imperatore?

Vide defensionem Bellarminianam Tom. 1. lib. 1. c. 18.

Sed regredior ad Doctoratum sacræ scripturæ: à quo spiritus sanctus,

*In Docto-
rati inau-
guratione
Anno Chri-
sti 1606.
habita. &
typis excu-
sa.*

sanctus, si vera canit Lutherus, neminem repellit, neminem reii-
cit, siue sit iuuenis, siue senex, siue laicus, siue sacerdos; siue mo-
nachus, siue secularis, siue vir, siue mulier. *Vinam digni essemus.*
optat Optatius Lutherus, quibus tales Doctores concedantur. Itē
nunc vos Canonistæ & Legistæ; & quærite; *Virum mulier possit do-*
torari: &, negatiue ad quæstionem respondendo, spiritui sancto
vos opponite. Ecce spiritus sanctus à Doctore sœminas non arceat,
si non mentitur Lutherus: qui adeo liberalis est, vt propemodum
asinam Balaami ad istum Doctorem euehat. Quanto minus igitur
excludi debet arguta illa Argula de Staupfen, de qua plura
dixi aliàs: & Catharina Cellia Argentinensis, quæ integrum librum
contra Ludouicum Rabum prædicantem Vlmensem scripsit: Et
Magdalena Heymairin, quæ edidit Epistolas Dominicales totius
anni in Canticorum formam redactas, Norimbergæ anno Redem-
ptoris 1569. excusas: Et præ omnibus ipsa Catharina Borra:
quam Lutherus, tantus Doctor, nunquam sibi iungi passus fuisset,
nisi & illa Doctoratum sacræ scripturæ à spiritu sancto accepisset.

Itē & vos mei Theologi, & Doctoribus vestris triginta ætatis
annos præstituite; nec, nisi sacris ordinibus initiatos admittite:
Iuuenes, indoctos, ineptos; vniuersim, omnes Laicos, etiam er-
ruditissimos, à Docturæ gradu repellite. Non ita Lutheri spiritus: qui
fores ad Doctoratum sacræ scripturæ omnibus pandit; siue sint ad-
huc implumes, & inuestes, siue grandæui; siue sacri, siue profani;
siue viri, siue mulieres: imò, quod dictu mirum, & vix credibile,
Lutherus, ne diabolos quidem ab hoc suo Doctore exclusit. Nā
in Colloquiis sympofiacis Latinis, Titulo de tentationibus ita scribit.
Summi, & principales Diaboli nobis aduersantur; quia sunt DOCTO-
RES THEOLOGIE. Turca, & Papistæ mediocres habent diabolos, non
Theologos, sed Iuristas. Habemus ergo ex sententia Lutheri, etiam
graduatos diabolos, Theologos & Iuristas. Hos omitto, & Iuri-
stis, præsertim verò Canonistis, examinandos committo. De illis
quæro: num sint Doctores Theologi scripturarii, an sententia-
rii seu scholastici? Si prius: ergo diaboli illi à spiritu sancto Do-
ctores sacræ scripturæ facti sunt: quia sacræ scripturæ Doctor sit à
solo spiritu sancto, vt vult Lutherus. At, dic quæso, quando, &
vbi hæc promotio peracta est. Si autem Diaboli illi, sunt Doctores
sententiarum, seu scholastici, à Papa igitur, vel Imperatore, vel ab
aliqua Academia creati sunt: quandoquidem isti sententiarum Do-
ctores

dores creant, vt ait Lutherus. At hic iterum recurrit quæstio: quādo, vbi, quomodo? Proferantur testes: producantur fide digna testimonia. Quæ Academia; quis Imperator, quis Papa, Diabolos summos, & primarios ad hunc Doctoralis dignitatis gradū euexit?

Cum igitur Doctoratus iste, quem finxit Lutherus, quando Anno Domini, M. D. XX. adhuc Anabaptistico paroxysmo & enthufiasmo agitabatur, penitus sit commentitius, & in fanatico hæresiararchæ cerebro procusus: sequitur, mendacium committi, quociescunque aut Lutherus seipsum sacræ scripturæ Doctorem nominat; aut ab aliis talis vocitatur cum respectu ad prædictū, quem ipse finxit, Doctoratū, quia vt Luthero vera denominatio sumi nequit ab eo Doctoratus gradu, qui nec est, nec fuit, nec erit. Quanquam, vt Luthero aliquid largiar; haud diffiteor, Lutheranas sagas, quarum antea facta est mentio, & id genus alias, non in scripturæ, sed in malitiæ, & nequitie Doctorillas promotas fuisse; non à spiritu sancto, sed à spiritu, quem paulo ante Lutherus, nobis depinxit: non in gymnasio, aut Lyceo, sed in illo monte, quem Germani à sceno, vocant den Semberg/ vel in assimili quopiam phrontisterio, ad quod barbigoris olidisque caballis inuectæ striges confluunt. Et hunc ipsum spiritum, non alium, Promotorem Lutherus ipse habuit, non ad scripturæ Doctoratum, sed ad scripturæ excidium & exitium.

Restat, vt indagemus, vtrum Lutherus fuerit promotus Doctor sententarius, seu scholasticus. Et vt omnes intelligant, quam liberaliter cum Luthero agā: concedo, cum Año salutis, M. D. XLV. Vitebergæ ab Andrea Carolstadio sententiarium, & si vult, etiam sacræ scripturæ, Doctorem creatum esse. Non inuestigabo, vtrum Lutherus fuerit infamis, infamiaque præpeditus Doctoralis dignitatis non fuerit capax: Nam *infamis non potest doctorari*, inquit Speculator, idemque sentit Bartholus: licet in contrariam partem abeat Baldus, cuiusquidem *magna est auctoritas, præsertim quando non habeat contradictionem*, inquit Alexander de Imola: sed, in ista materia, vt & in multis aliis, *magnum habet contradictorem*, inquit Petrus Lenauderius in libro de priuilegijs Doctorum, nempe Dominum Bartholūm, patrem Iuris.

Nec quaram, vtrum Lutherus tunc fuerit excommunicatus: nam talis, vt idem Bartholus docet, Doctorali honore insigniri nequit. Abloluo Lutherum ab omni vinculo excommunicationis: in
quan-

quantum possum, & ipse indiget, ad Doctoralis inaugurationis effectum consequendum. Nec quæram, vtrum fuerit spurius; tametsi non desunt, qui dicant, illum natum ex honestissimo patre qui dicitur *Incubus*: de quo extat vetus versiculus: *Te signato cruce cum venerit Incubus ad te*. Quia licet nonnulli Doctorum abnuant, illegitimum Doctoralis dignitatis capacem esse: alij tamen affirmant, quorum auctoritate Lutherus facile se tuebitur.

Nec curiosius inquiram, vtrum Lutherus caput sufficiente doctrina instructum ad Doctoralem pileum attulerit? quia ineptus non potest creari Doctor: & si creetur, non fit Doctor, sed cuculus: nec est Doctor, sed *Dolor*, vt inquit Cynus. Hæc omnia indiscussa relinquam, & ex liberalitate dabo; Inaugurationi Lutheri nec Iuris, nec facti vllum defectum interuenisse: nego tamen illum post annum Domini Millesimum, quingentesimum vigesimum Doctorem mansisse. Causa negationis est; quia Lutherus à Leone X. Pontif. Max. & ab inuictissimo Imperatore Carolo V. de Doctoratu deturbatus, & degradatus, & omni dignitate Doctorali, priuilegiisque priuatus fuit.

Ergo ne inquires, Doctores degradari possunt? Quis dubitat? Ostendam id non iam, sed crastina luce. Redite cras qui nunc adestis: probabo duo: Primum; Doctores posse degradari; Lutherumque re ipsa fuisse degradatum. Deinde; Lutherum, post regradationem, fumos orbi vendidisse; quando se pro Doctore Theologix venditauit; & Doctoratum à Carolstadio acceptum, sed postea amissum, tanquã legitimum vocationis suæ ad Catholicam fidem exterminandam, sectamque suam introducendam, argumentum imperitis obrusit. Hæc duo cras, Deo propitio, exequar: atque adeò Lutherum de gradu Doctorum deturbabo: & hunc nostrum Candidatum in eodem honestissimo gradu collocabo.

Nunc, quod benè vertat, disputationem auspicemur: vt & suas partes in hac vespertina scena noster Candidatus agat; quandoquidem ego iam egi meas.

THESES



T H E S E S
EX SVMMMA S. THOMÆ,
IN CATHOLICA IN-
GOLSTADIENSI ACADEMIA
Kalendis Septembribus Año M. DC. IX.
ad vespertinam disputationem
propositæ.

A


REVERENDO ET CLARISSIMO DOMINO
MARTINO MORESCIO, POLONO, SS.
THEOLOGIAE LICENTIATO,

Pro

Suprema S. Theologiæ laurea.

Ex prima Parte.

T H E S I S P R I M A.

heologia non est propriè dicta scientia. Est vna speciè infima, practica simul, & speculatiua. Ratio eius formalis sub qua, est diuina reuelatio. Est habitus per se acquisitus. Nullus hæreticus, quâ talis, est, aut esse potest Theologus. Ac proinde cum sectarij se Theologos, aut sacræ Theologiæ Doctores nuncupant, se, & alios ludificant. Ex quo sequitur, nullum hæreticum posse creari Theologiæ Doctorem.

S E C V N D A.

DE v m esse, & vnum esse, euidenter demonstrare licet. Trinum esse, sola fide creditur. Spiritus sanctus à Patre & Filio procedit. Si non procederet à Filio, non distingueretur à Filio. Angelus est in loco non tantum per operationem, sed & per substantiam suam.

B

Ex prima

Ex prima secunda.

P R I M A.

Essentialis beatitudo non consistit in sola visione DEI; sed & in fruitione voluntatis.

S E C V N D A.

Potest Legislator humanus ferre legem, quæ obliget in conscientia. Potest aliquod verum cognosci, & aliquod bonum opus morale fieri, sine speciali auxilio DEI.

Ex secunda secunda.

P R I M A.

Pontificis auctoritas ex cathedra aliquid definientis, simpliciter infallibilis est. Nullus Pontifex, etiam quo ad priuatam personam suam, hæreticus fuit. De fide est, hodiernum Pontificem Paulum V. esse verum & legitimum Christi in terris vicarium.

S E C V N D A.

Inter regulas, quas Pontifex ante definitionem consulere debet, est etiam scriptum DEI verbum: quod Nouatoribus semper est in ore: licet eius umbram duntaxat habeant. Neque Hæreticorum Biblia, aliter sunt Biblia, quam corpus humanum exanime, homo.

Ex tertia parte.

P R I M A.

Lutherani, Vbiquistæ sunt Eutyichianorum fratres: stultè Vbiquitatis commentum colligunt ex vnione naturæ humanæ cum diuina in eadem hypostasi, quæ vnio substantialis est. Hæc propositio, *Verbum est homo*; non est essentialis, sed substantialis.

S E C V N D A.

Deipara VIRGO absq; peccato originis concepta fuit. Et quandoquidem adhuc in trigintadiali festiuitate Assumptionis versamur; asserimus, eam anima, & corpore in cælum assumptam: Et hoc tam certum esse, vt contrarium dicere, sit prorsus temerarium, & proximum hæresi.

O R A T I O D O M I N I C A N D I D A T I.

IK. Non. Septemb. dicta.

I Mitabor hodie eos, qui apud Arcopagitas dicebant; *Admodum Reuer. & Mag. Dñe. Rector, Illustrissime Marchio, Illustres, atque Generosi Comites, & Barones; Patre. Academici amplissimi, cateriq; virtute, & eruditione ornatissimi Auditores*; & absque vilo procæmio rem ipsam statim aggrediar. Rem, inquam, neque ab hoc loco, & auditorio, neque ab huius diei inauguratione abhorrentem.

Quæstio.

Quæstio est, Vtrum Lutherana, & Caluiniana Academia veros Doctores Theologos nobis procreent, an, tantum Doctorum laruas, specioso hoc vocabulo, & tegumento velatos, quibus ultra nomen nihil suppetat, & quibus Doctorum ratio, notio, & immunitates non magis competant, quam picto homini hominis veri ac viuentis definitio? Dixi, *Doctores Theologos*: quia, licet quæstio vniuersim ad Doctores quoque Iuris, Medicinæ, & Philosophiæ extendi possit; ego tamen, tanquam Theologiæ Doctrinæ Candidatus, de solis Theologiæ Doctoribus disputabo. Occurrunt autem duplicis generis Academiae religionis auitæ desertrices. Nonnullæ; quæ olim Catholica fide claruerunt, Pontificumque, Imperatorum, ac Regum Catholicorum auctoritate primitus erectæ, priuilegiis, & variis immunitatibus donatæ fuerunt. Ex quorum numero sunt Academiae Vuitebergenfis, Lipsienfis, Tubingensis, & similes. Aliæ sunt, quæ post exortas istas hæreseon pestes, Lutherum & Caluinum, exstiterunt. Ex quibus quasdam non tantum Reges & Principes Lutherani, vel Caluiniani, sed & Catholicae fidei addicti Imperatores confirmarunt, & prærogatiuis adauerunt.

Hac distinctione præmissa, ad quæstionem propositam respondendum censeo, nullam Academiam, siue prioris, siue posterioris ordinis, creare, aut creare posse veros Theologiæ Doctores: eosque quos nobis proferunt, nil aliud esse, quam Doctorum veri nominis volatiles umbras, & vitæ, spiritusque expertia simulacra. Quod variis modis ostendi potest. Primò quia Doctor Theologiæ creari nequit, nisi ab illo, cui legitima creandi Doctoris potestas concessa est: hanc non habent Academiae, quæ à Catholica fide vel desciverunt, vel in ipsa hæresi prognatæ sunt. Neque enim credibile videtur, Pontifices & Imperatores, ac Reges Catholicos, Academiae olim aliter potestatem Theologiæ Magistros & Doctores renunciandi concessisse, quam, si in Catholica, Apostolica, & Romana fide perseuerarent: cum tota hæc graduum, & titulorum Academicorum solennitas aliò ab illis non fuerit relata, nisi ad Catholicae, Apostolicae, & Romanæ religionis conseruationem, & propagationem. Quis verò sibi persuadeat, eos voluisse, vt illi veri & legitimi Doctores censeantur, qui hanc fidem totis viribus ex professo oppugnatum eunt: & eum in finem ab Academiae veræ religionis desertricibus instituuntur, & promouentur, & iuramento insuper adstringuntur, vt sectas tueri, & auitæ fidei instituta conuel-

lere gnauiter insistant? Quis non animaduertit, hæreticorum Do-
ctorum inaugurationem ex diametro aduersari Pontificum, Im-
peratorum & Regum Catholicorum fini: qui alius non fuit, quam
vt perhuiusmodi Doctores, quos Vniuersitates Ecclesiæ profere-
bant, vera fides plantaretur, defenderetur, ac propagaretur? scili-
cet Pontifices, & Orthodoxi Principes voluerunt, vt lupi gregis
Dominici inuafores & dissipatores pestilentissimi, fures & latrones
animarum, titulis & insignibus Academicis decorentur, & Docto-
res salutentur, quò maiore cum auctoritate, & securitate ouile
Christi deuastare queant. Scilicet Pontifices, & orthodoxi princi-
pes voluerunt lupos, fures, & latrones in Academiis creari, & pri-
uilegiis ad rapinas, furta, & latrocinia excitari, quasi non sponte
sua extra Academias satis vbere prouentu proueniant.

Quis vnquam audiuit lupos, fures, & latrones priuilegiis,
certisque honorum insignibus impelli, & decorari ad hoc, vt offi-
cia luporum, furum, & latronum industriè ac indefessè obeant?
Nam, cum Lutheranus, aut Calvinianus Promotor Theologus,
hac, vel simili veborum formula Candidatum hæreticum Theolo-
giæ Doctorem facit: *Ego te Theologia Doctorem constituo; dans tibi om-
nia priuilegia, quæ huic gradui annexa esse solent; nil profectò aliud di-
cit; quàm, ego te lupum, furem, & latronem animarum creo, constituo,*
Rom. 30. *pronuncio: & do tibi facultatem, vt non intres in ouile ouium per ostium,*
Ibid. *sed ascendas aliunde: vt impleatur scriptura, quæ dicit: Amen, amen*
dico vobis, qui non intrat per ostium in ouile ouium, sed ascendit aliunde;
ille fur est & latro. Do tibi etiam facultatem, vt fureris, mactes, &
perdas: quia scriptum est: fur non venit nisi vt furetur, perdat, & ma-
ctet. Do tibi insuper facultatem, vt oues Christi rapias, & disper-
gas: vt impleatur alia scriptura, quæ dicit: Lupus rapit, & dispergit
oues. Quis sanæ mentis sibi persuadeat, hæc talia fieri auctoritate,
& consensu, Pontificum Romanorum, Imperatorum, Regumq;
Catholicorum, qui superioribus seculis, ante Lutheri, & Caluini
ortum, Academias; quæ eiusmodi Doctores hodie nobis procu-
dunt, Pontificiis, Cæsareis, ac Regiis decretis, & immunitatibus
cohonestarunt?

Vt autem isti lupi, fures, & latrones securis munus suum ad-
ministrant; amictuntur vestimentis ouium, hoc est, insignibus, &
stemmatis Doctoralibus, pileo, eponide, annulo, cingulo exor-
nantur; in cathedra sublimi collocantur: & liber illis primum clau-
sus, deinde apertus proponitur. Quæ hic lupi suspicio? quæ furis?
quæ latro.

quæ latronis? nulla, si animum non aduertas: maxima, si aduertas, præsertim ad illud Redemptoris nostri monitum: *Attendite à Matt. 7. falsis Prophetis*, hoc est, à falsis Doctõribus, qui veniunt ad vos in vestimentis ouium, hoc est, doctõreis titulis, & insignibus insigniti; intrinsecus autem sunt lupi rapaces: à fructibus eorum cognoscetis eos. Qui nam isti fructus? antea recensui ex S. Ioanne; *furari, mactare, perdere, Ioan. 10. rapere, dispergere*. Hosne lupos, hosne fures, hosne latrones creent, foucant, alant, educent, priuilegiis, & prærogatiuis muniant, titulisque honorificis locupletent Pontifex, Imperator, & Reges Catholicæ religionis custodes, ac tutores? Hosne isti emittant in gregem Dominicum, vt rapiant, dispergant, mactent, perdant? Mihi sanè nemo hoc persuaserit:

Vt cætera omnia adessent, quæ ad promotionem Doctõris Theologi requiruntur; deficeret tamen legitima Theologiæ Doctõres promouendi potestas: quam quæuis Academia, hoc ipso, quod hæresin amplectitur, amittit. quia, iam non amplius Doctõres, sed seductores nobis dabit: nec Doctõres, sed lupos diademate Doctõrali coronabit. Quò fit, vt minimè credere oporteat, Catholicos Imperatores & Reges, si quando hæreticam Academiam sua auctoritate confirmant, id velle, vt tales Theologiæ Doctõres in iis creentur, qui nomine sint Doctõres, re ipsa lopi, fures, latrones. Iniuriosus enim in Imperatoriam Maiestatem fuerit, qui ei hanc mentem, & voluntatem Ecclesiæ orthodoxæ, & priscæ fidei tam perniciosam adscribere ausit. Quod si quis Rex, aut Princeps, à religione vera alienus, extra Imperium Romanum, suo in regno, Academiam instituat, & Theologiæ Doctõres creandi potestatem faciat: non ideo candidati Nouatores, tali auctoritate creati, veri Theologiæ Doctõres erunt; quia deficit aliquid aliud, de quo paulò post: vt taceam; dubitari à nonnullis; num Imperator, aut Rex Imperiali, vel Regia sua auctoritate Doctõres Theologiæ, & Canonum renunciare, aut aliis renunciandi ius concedere queat: cum Imperator sub sit istis scientiis. Quapropter non videtur talis Doctõratus posse emanare ab eo in tali materia. Ita audiui aliàs attentari: tamen, quia scriptum non reperio, non affirmo, inquit summus Canonum interpres Felinus in cap. *Per tuas*, extra de Maioritate, & obedientia. Benè, quod non affirmat Felinus. quia non est ratio vrgens; quæ Imperatori hanc potestatem abiudicet: Nam & Pontifex est sub sacra scriptura; & tamen sacræ scripturæ Doctõres facit. Et Academiæ sub sunt sacræ scripturæ; & Iuri Canonico, neque ideo ius creandi Do-

Doctores sacrarum literarum, & Iuris Canonici illis adimitur. Et fuerunt, suntque Academię Catholicę, Imperatorum duntaxat privilegiis, & concessionibus instructę, & munitę: attamen non existimo ullum fore, qui legitimos Theologię & Iuris Pontificii Doctores ab illis creatos esse, vel etiamnum creari abnuat: & tamen hanc potestatem à solo Imperatore habent.

Secundò, Lutheranos, & Caluinianos non esse veros Theologię Doctores, inde ostendo: quia carent vero verę Theologię habitu: cum careant vera fide. Habitus autem Theologię ex articulis, & principiis fide supernaturali creditis deducatur, & enascatur. Itaque, sicuti fieri non potest, ut quis in scientiis habitum conclusionum acquirat, vel possideat; si careat habitu principiorum, ex quibus conclusiones illę deriuantur: ita fieri nequit, ut quis verum habitum conclusionum Theologicarum adipiscatur, aut eo polleat; si careat principiorum habitu, qui est vera, & diuinitus infusa fides, diuinę reuelationi, tanquam basi, & fundamento suo innixa: cui & ipse Theologię habitus, saltem mediatè, inædificatur. Quis autem hæreticum vera fide præditum esse affirmet? Ergò nec verę Theologię habitu præditus est. Ergò nec verus Theologię Doctor est. quia verus Theologię Doctor, non nisi verę Theologię Doctor est.

Si verò per Theologiam, cum sectarii Theologię Doctores creantur, aut ab aliis hoc titulo afficiuntur, intelligamus, non illum habitum, qui ex principiis fidei deducitur, & ab illo specie distinguitur, sed ipsam principiorum fidei, & eorum, quę in Bibliis continentur, immediatam, & omni discursu, & ratiocinatione carentem cognitionem; ne sic quidem veri Theologię Doctores erunt: quia, quę in Bibliis traduntur, non diuinā, sed humanā duntaxat fide & cognitione credunt. At humana fides & cognitio non est vera & Theologica, infusa nimirum, & supernaturalis notitia: nec diuina reuelatione fulcitur; nec propositione Ecclesię, tanquam conditione quadam sine qua assensus nullus esset, sustentatur.

Adhęc; hæretici non habent verum Verbum Dei, & germanas, genuinasque sacras literas, fieri ergò nequit, ut verę Theologię, & sacrarum literarum veri Doctores fiant vel nominentur. quia verū Dei Verbum non est, quod mutilum, & mutilatum, truncum & truncatum est, quod in numeris locis deprauatum; inuersum, & peruersum est: & cui noua: & apud orthodoxos superioris ætatis inaudita sententia, & intelligentia subiicitur. At, talia sunt Biblia Lutherana, &

rana; & Calviniana. Ex veteri enim Testamento exsecuerunt Tobiam, Iudith, Baruch, Machabæos, Ecclesiasticum, librum Sapientix; grandesque partes Estheris, & Danielis. Ex nouo amputarunt Lutherani Epistolam S. Iacobi, Iudæ Apostoli, vnam S. Petri, duas S. Ioannis, Epistolam ad Hebræos, Apocalypsis vix tuta mansit: pleraque perperam translata sunt: maxima pars in alienum, & falsum sensum detorta, contempto, penitusque repudiato Ecclesiasticæ traditionis Canone. Quales igitur isti Doctores Theologiæ, hoc est sacræ scripturæ; qui veram scripturam non habent? eamque forma, vita, & sensu suo spoliant? Num vera scriptura est, cui alienus, & à spiritus sancti mente planè diuersus sensus subternitur.

Obiciat quis: Num tu Lutheranis, & Calvinianis Doctoribus omnem titulum, & honorem Theologicum, & Doctoralem adimes? Non certè adimam, nam qui adimerem id quo nunquam præditi fuerunt? Creentur, & appellentur Doctores Theologiæ, non simpliciter, sed Lutheranæ, vel Calvinianæ. Salutentur Doctores Theologi, sed Lutherani vel Calviniani. Habeatur & decernatur illis iste honos: Si honos est, esse Doctorem Lutheranæ, vel Calvinianæ Theologiæ: quæ à morologia, & spermologia nullò discrimine secernitur: dummodo in eorum, qui hoc titulo verè sunt insigniti, censum & confessum non admittantur.

Hoc tamen filieri non debet: si quando Doctor Theologiæ Lutheranæ, vel Calvinianæ ad Catholicorum partes transit, neque Doctoralem gradum in orthodoxa Vniuersitate sumit; & tamen Doctor reputatur, & appellatur: transire tunc communi orthodoxorum consensu & approbatione, putatitium gradum illum apud hæreticos receptum, in verum, & legitimum; posito, quod ex parte subiecti non sit doctrinæ defectus, quo quis ad verum, & genuinum Doctoratum in habilis efficiatur: nam hoc ipso, quòd talis ad Catholicam fidem regressus Doctorum titulis, & privilegiis gaudet; colligimus tacitum in eius Doctoralem dignitatem Pontificum, Imperatorum, Regum, Principum, & Academiæ Catholicarum consensum, ita vt post transitionem ad orthodoxiam, legitimum habeatur, quod antea illegitimum erat: quandoquidem talis à commentitiis, & stramentitiis Theologia, ad veram, & à scriptura ficticia, & profana, ad genuinam, & sacram transit.

Tertiò, Lutheranos, & Calvinianos Theologos, non esse veros Doctores, indeliquet, quia veræ fidei professionem non faciunt: cum, si seriò facerent, mox hæretici esse desinrent. At nulli
patet adi-

patet aditus ad honorem Doctorem sine hac professione ex præscripto Pij IV. Pontif. Max. qui Academicos Gradus absque ista professione collatos, ac susceptos, irritos, infectos, inualidos, & plane nullos esse iubet.

Obiiciat quis: Hanc Pontificiam sanctionem nihil ad Nouatores spectare. At certè mirum hoc fuerit. An non Ecclesiæ iurisdictioni subiacent? licet, sint rebelles, ceruicesque suas à legitimo imperio excutere velint. Imò, vsque adeò hæc Bulla hæreticos tangit; vt eum in finem præcipuè conscripta, & promulgata fuerit; ne sectariis ad gradus, & titulos Academicos ianua pateret. Dices; Hanc constitutionem non fuisse receptam, ac proinde, non obligare. At vnde hoc tibi notum? Deinde, nego Pontificias sanctiones non obligare, nisi à subditis recipiantur. Contrarium grauissimi Theologi docent. Dices. hanc Bullam alicubi non obseruari conniuncte & dissimulante Pontifice. At vnde hæc conniuncta, & dissimulatio tibi constat? Quodeius argumentum, vel indicium profers? Accedit denique, quod Lutherani & Calviniani Theologiæ Candidati plerunq; prorsus sunt inepti. Quocirca ob ineptitudinem quoque ad Doctorem dignitatem euchi nequeunt.

Plures suppetebant rationes, quibus demonstrari potest, eos, qui apud sectarios Theologiæ laurea, vt ipsi quidem autumant, decorantur; à verorum Doctorum numero segregandos esse. Sed verbis modum statuere, & ad id accedere debeo, cuius gratia hodierna celebritas est instituta.

Post paucas hebdomadas annus erit, quando Doctoralis laurea petendæ, & accipiendæ licentiam accipi. Nunc cum abiturum ex hac celeberrima Academia in patriam, longissimo locorum intervallo ab his regionibus sciunctam mediter: insufurrauit mihi satyricus carmen illud suum; Quò mihi diuitiæ, si non conceditur vti? Quo mihi licentia capiendi supremi in Theologia honoris, si hac licentia non utar; præsertim cum iureiurando obstrictus, eâ extra hanc vniuersitatem vti non valeam; neque fortassis vnquam occasio sese datura sit, vt in has orbis partes reueniam. Volui igitur id, quod mihi per impertitam licentiam licebat, ad opus conferre, & studiorum meorum, vt sic loquar, ædificio extremum complementum, & quasi colophonem imponere, idque tuis R. P. GRETSERÆ, auspiciis: qui pro tua humanitate haud grauatè, quod tibi ab amplissimo Collegio Theologico commissum est, transactum dabis.

ORATIO

EXsequar nunc duo illa capita, quæ hesterno die in hodiernum reieci, admodum Reuerende & Magnifice Domine Rector, Illustrissime Marchio, Illustrēs, atq; Generosi Comites, & Barones, Patres Academici amplissimi, ceteriq; Auditores virtute, & doctrina spectatissimi; primumque ostendam Lutherum per degradationem amisisse illum Doctoratum, quem anno Redemptoris M. D. XII. Vuitebergæ, promotore Andrea Carolstadio, acceperat: secundò, Lutherum, si degradatus fuit, vt re vera fuit, non nisi fraudulenter postea Doctoratum, quem amplius non habebat, pro legitimo vocationis testimonio venditasse, & imperitis obtrusisse.

Lutherum degradatum fuisse; hoc est, constitutionibus, scriptisque Leonis X. & Caroli V. titulum, nomen, honorem, insignia, stemmata, priuilegia, & immunitates Doctorum perdidisse: (in hac enim priuatione consistit degradatio, seu, vt Cuiacius appellat, regradatio:) testatur ipsemet Lutherus Præfatione in librū aduersus falsò nominatum Ordinem Episcoporum: cuius hæc sunt verba; *Quandoquidem per Papalem, & Casarcam indignationem, titulis meis exutus sum, & character ille bestia, de qua in Apocalypsi, mihi tot Bullis erasus & deletus est: sic, vt neque Doctor Theologia, neque quidquam eiusmodi creatura humana & Papistica vocer amplius, non valde is honorum damnis sum territus: talis enim fuci, talium personarum humanarum me omnium maximè semper puduit coram D E O.*

In hac Lutheri oratione duo obseruanda sunt. Primùm, conuicia, quibus Doctoratum incescit. Nominatenim *characterem bestie Apocalyptica*, hoc est, ipsius cacodæmonis symbolum, & tesseram. Secundò *Papisticam creaturā*, eò quod Doctoralis gradus à Pontificibus, Pontificiq; addietis Imperatoribus, ac Regibus in Ecclesiam & Christianā Remp: introductus sit. Tertiò *nominat fucum*. Quartò *Humanam personam*, hoc est, laruam scenicam & histrionicam. Quintò mentitur, se coram Deo semper pudore suffusum ob Doctoris titulum, nam adeò Doctoralis gradus, & dignitatis non puduit Lutherum, vt, quod alibi ex Cochleæ recensui, pecuniam quoque ad Doctoratum suscipiendum necessariam tagacibus manibus cleperit, seu, vt apertius dicam, furatus fuerit.

*In Actu
Doctorali
1606.*

Deinde obseruandum est, Lutherum loco motionem suam, & de dignitate Doctorali detractionem, Pontificis, & Imperatoris decreto factam, agnouisse, nec hoc solum; sed & thrasonicè palam præ-

lām prædicasse. Nam à Leone X. anno Christi M. D. XX. tertio no-
nas Ianuarij publico, ac solenni ritu euulgata Bulla, hæreticus per-
tinax, perniciosus, & pestilens declaratus, & anathemate percus-
sus, & omni dignitate, ac prærogatiua, & per consequens, etiā
Doctōrali honore exutus est: Et mox sequenti anno à Carolo V.
Imperatore proscriptus; igni, & aqua interdictus, & Imperiali
banno subiectus. Et vt hæc regradationis pœna Luthero à Pontifi-
ce, & Imperatore non fuisset inflicta; ipso tamen in hæresin lapsu,
hæreseosque contumacissima, & peruicacissima defensione, Do-
ctōris honorem & priuilegia amisisset: quia, vt rectè dicunt & edi-
cunt Imperatores Constantinus, Constantius, & Constans; *priuile-
gia, quæ contemplatione religionis indulta sunt: catholica tantum leges ob-
seruatoribus prodesse oportet. Hæreticos non solum ab his priuilegijs alienos
esse volumus, sed aduersis muneribus constringi & subiici.* Quis autem
ambigat, priuilegia, ornamenta & insignia Doctōralia, atque a-
deo ipsum Doctōris Theologi nomen ac titulum, à Pontificibus,
Imperatoribus, & Regibus, non nisi in gratiam, fauorem & emo-
lumentum Catholicæ religionis, & Catholicorum fuisse primitus
instituta, & in scholas introducta?

At fortè imperitiori cuiquam nouum ac insolens videbitur,
Doctorem degradationis pœna plecti posse. Atqui, hoc certi, &
explorati iuris est. *scias*, inquit Hippolytus Riminaldus in Cap:
Clerici, extra de Iudicijs, *quod Doctōr ita degradari potest, sicut Clericus,
secundum Bartholum in l. 2. §. ignominia ff. de infamia.* Item *scias*, *quod
degradatus, est de foro Iudicij Laici.* Christophorus quoque Lafran-
chinus in libro, *Virum Doctōr præferendus sit militi*, an vice versa, mi-
les Doctōri? docet ex Martino Laudensi, Doctorem vltimo sup-
plicio affici non posse, nisi prius degradetur; eo modo, quo sacer-
dos, Diaconus, vel subdiaconus, mortis reus, de gradu suo, so-
lenni ritu, & cæremonia, deici solet. In Germania tamen vix hoc
feruatur. Quocirca cum ante aliquot annos, quadam in vrbe, ne-
mini vestrum ignota, Doctōr laqueo adiudicatus esset, quærere-
turque, an non prius quàm suspenderetur, degradari deberet: res-
ponsum est à quodam; omnino degradatum iri; at tum aiebat,
quando de gradibus scalæ à carnifice deturbabitur. Sed vulgaris est
hæc degradatio, non luridica; qualis, cum quis indutus & ornatus
omnibus ornamentis Doctōralibus, iisdem postea simul cum vni-
uersis priuilegijs Doctōreo honori annexis exiit, ac priuatur:
vel saltem per principis sententiam ac rescriptum, *titulo, dignitate, &
in signibus*

in signibus Doctoreis spoliatur: quo degradationis genere Lutherus à Leone X. & Carolo V. multatus fuit. Neque enim Lutherus post Comitatus Vuormaciensia, ea in loca venit, ubi Doctoralibus ornamentis indui; & mox eisdem iterum solenniter exui posset: sed, in Saxonia, sub tuta tutela se continuit, quare per sententiam duntaxat à legitimis iudicibus latam de gradu Doctorali detrudi potuit.

Cum autem ipsemet publicè confessus sit; se suo Doctorali honore à Pontifice, & Cæsare exutum fuisse; ac propterea, ne sine nomine foret, *Ecclesiastem Witebergensem*, & *Euangelistam* se in contemptum Papæ, & Imperatoris indigitauerit: Non satis dispicio, quo iure postea Doctoris titulum usurparit, & ab aliis sibi tribui passus fuerit? Quæro enim, à quo Doctoratu Doctor audierit? Num ab illo, qui spiritu sancto Promotore confertur? At iste fictitius est; ut heri ostensum. An ab illo, quem accepit, Promotore Carolstadio, in Academia Witebergensi, cum adhuc Catholicam fidem coleret? At istum Doctoratum amisit per *κατάργεσιν* seu legitimam regradationem; quæ se hoc Doctoratu multatum fuisse, confessus & palàm testatus est Lutherus; ut antea vidimus.

Nec audiam, si dicas; hunc Doctoratum Luthero restitutum. Vbi enim reuocauit Leo X. illam Bullam, quæ inter Leoninas trigessimum septimum locum obtinet? Et, ubi Carolus V. retractauit suam sanctionem? quarum vtræque Luthero omnem dignitatem & honorem etiam literarium & Academicum iuridicè ademit. Neque, vnquam postea Lutherus gradum Doctoralem resumpsit. Et, ut resumpsisset; statim quæstio exstitisset, num huiusmodi Doctoratus valeret: quia, ut Baldus, & alij ex Iureconsultis docent: Doctor suo Doctoratu propter aliquod crimen priuatus, non potest iterum *doctorari*. Obstitisset quoque Luthero inflicta excommunicatio, & perpetua infamia, qua & à Pontifice, & ab Imperatore notatus est: quia, ut Doctores tradunt, nec excommunicatus, nec infamis creari potest Doctor: neuter enim capax est dignitatis. Doctoratus autem dignitas est. Nec dici potest: Lutherum post mortem denuo Doctoratum acquisiuisse, quia, ut Panormitanus, & alij docent; mortuus non potest fieri Doctor.

Si contendas: Lutherum etiam post degradationem, mansisse Doctorem; sicut sacerdos degradatus verè est sacerdos: degradationem enim tantummodò tollere insignia; ornamenta, vsum & executionem doctoratus; quemadmodum & sacerdotii: Respon-

20. deo, disparem esse rationem: quia gradus sacerdotij imprimie: indelebilem characterem. Quò fit, vt quis sacerdos maneat, quandiu character ille manet: manet autem perpetim. At Doctōratus nihil, quod rei nomen mereatur, in homine ponit; sed est publicum quoddam ex publica auctoritate eruditionis partē testimonium, certis ritibus & stemmatis concessum; vnà cum variorum priuilegiarum communicatione, & data docendi potestate. Quibus omnibus denuo quis priuari potest, si culpam tali priuatione dignam admittat: quæ, si tollantur, quid quæso de Doctore supererit?

Lutherus tamen, vt in aliis plerisque, sic etiam cum suo Doctōratu mundum insigniter fascinauit ac dementauit: cui non modò persuasit, se adhuc habere Doctōratum: quem, vt ipsemet confiteatur, per degradationem amiserat; sed & huius, quod admirabilitate sua omnia miratranscendit, asseclis suis fidem fecit, Doctōratum suum esse legitimæ vocationis suæ ad res nouandas argumentum: omnis enim, qui pro legitimo Ministro haberi cupit; legitimæ suæ vocationis, ordinationis, & missionis tabulas poscentibus exhibere debet. Lutherus igitur, cum nihil aliud occurreret, ad Doctōratum suum confugit cum alibi, tum Tomo 5. Ienenſi Germanico in Epistola contra clancularios, & angulares Prædicatores. Et quærentibus, in qua potestate facis, quæ facis? in qua potestate Missam exterminas? Monasteria diruis? vota monastica soluis? sacramenta mutilas, & alia millena perpetras? Respondit Lutherus; *Doctōr sum etiam post degradationem, ergò licitè facio, quid quid volo.* Et in Colloquiis symposiacis Titulo, de *Antichristo*; dicit, se suum Doctōratum, tanquam inuictum clypeum, vniuersis Diaboli tentationibus opposuisse. Ita ne verò? Doctōratum, quo exutus es, teipso teste, pro testimonio legitimæ vocationis tuæ nobis produces? Num homines in fungos abiisse credis, qui tibi hanc consecutionem concedant: *Sum Doctōr, etiam post degradationem: ergò legitime vocatus, & missus ad vetera instituta conuellenda, & noua introducenda.* Miror stuporem & hebetudinem Diaboli, qui Luthero Doctōratum suum tentationibus obiectanti; non occinuerit: Non metuo tuum Doctōratum, qui nullus est. An non ipsemet dixisti, scripsisti, te tuo Doctōratu à Papa & Cæsare priuatum? An non hoc nomine effusissimè tibi gratulatus es? Cur igitur me iam stramentitio tuo Doctōratu repellere, ac perterrefacere frustra tentas?

At demus, Lutherum non fuisse degradatione punitum; sed, retinuisse

retinuisse Doctoratum, quem à Carolstadio acceperat; num ideo inde nobis persuaderi sinemus, hunc eius Doctoratum fuisse legitimam ordinationem, vocationem, & missionem: ad ea agenda, quæ postea, furiarum impulsu, egit? Minimè verò: quia, *character bestia Apocalyptica, fucus, creatura papistica, larva scenica, & histrionica*, non potest esse legitimæ vocationis testimonium: sed Doctoratus, quem Lutherus habuit à Carolstadio, omnia ista, quæ dixi, fuit, teste ipso Luthero; Non est igitur legitimæ vocationis testimonium.

2. Si Doctoratus est legitimæ vocationis argumentum, cur Lutherus alibi insignia Doctoralia, & omnes ritus Academicos in his honoribus conferendis adhiberi solitos, innumerabilibus conviciis proscidit & laceravit? Cur penitus abrogavit? Cur Academia Vuitebergensi auctor fuit, ut plurimis annis collationem gradus Theologici, & aliorum intermitteret? Cur aliæ Academiae idem exemplum secutæ sunt? *Nodum in scirpo querere, & humani aliquid pati videntur*, inquit Leonardus Hutterus, Prædicans Vuitebergensis, in promotione quadam Doctorali typis excusa, *qui promotiones nostras Doctorales pro vera, legitima, ac solenni ordinatione ad ministerium agnoscere nolunt*. Si hoc ita est, nodum ergò in scirpo quæsiuit Lutherus, cum promotiones Doctorales penitus respuit. cumque hoc eius enthusiasmo Anabaptistico afflata Academia Vuitebergensis non nisi post multos annos hæc insignia, stemmata & digmata Academica denuo his clargiri cœpit.

3. Si Doctoratus est ordinatio; certumque testimonium legitimæ vocationis ad ministerium Ecclesiasticum; quomodo ordinabantur, vocabantur, & mittebantur Lutherani Prædicantes, cum Doctoratus Theologicus ex Vuitebergensi Academia exularet? Quomodo ordinantur, vocantur & mittuntur alii minorum gentium, & patellarii Prædicantes; qui Doctorum titulo non clarent? quorum innumerabilis est caterua.

4. Si Doctoratus est ordinatio ad Ministeriū, & legitima vocatio ad id agendum, quod quis agere cogitat; legitimè ergò ordinantur, & vocantur hodie Calvinistæ: quia & ipsi æquè, ac Lutherani suis in scholis Doctores creant. Si ergò Lutherus legitimè ad suum negotium ordinatus, & vocatus est, quia Doctor creatus est; cur Calvinista non vocaretur, & ordinaretur legitimè ad sua dogmata spargenda; quando Doctoralia insignia publicè in Academia quam caput?

5. Imò velint, nolint, fateri cogentur Lutherani, etiam Pontificios legitime ordinari, & vocari, quando in Academiis renunci-
antur, & declarantur Theologiæ Doctores. Nec est, quod excipi-
ant de Academiis Catholicis, seu Pontificiis. Nam Lutherus, qui
legitimam suam vocationem in Doctoreatu constituit, non nisi in
Catholica Academia Doctorem adeptus est: nec nisi ritu Catho-
lico, quia anno 1512. quo Lutherus Vuitebergæ creatus est Doctor,
Academia Vuitebergensis erat Catholica, seu Pontificia. Neq; vn-
quam Lutherus alio doctoreatu gloriatus est, quàm eo, quem acce-
perat Vuitebergæ, promotore Carolstadio. Et tamen hunc Catho-
licum, & Catholicè susceptum Doctorem pro legitima vocatio-
ne habuit, & venditavit: scribensq; ad Leonem X. Pontificem
Max. Præfatione in Resolutiones Tomo 1. Latino Vuitebergensi
audacissimè mentitur; se ea, quæ agebat, agere auctoritate Ponti-
ficia, & Cæsarea, qua Doctor creatus fuerit: nam nec Pontifex, nec
Imperator Catholicus Lutherò, aut vlli alteri per Doctoralia insi-
gnia potestatem dedit; vt, antiqua fide euerfa, nouam introduce-
ret: sed hæc eorum mens fuit; vt, quisquis ad Doctoratus gradum
proueretur, autam religionem totis viribus defensum iret; nec,
vel latum vnguem in explicatione sacrarum literarum à traditione
maiorum, & Ecclesiastici Canonis norma desisteret. Quid quod
Lutherus desciscendo à Catholica fide, & noua placita procuden-
do, in periurium incidit! Nam, cum Doctor crearetur, iuravit, se
illam fidem propugnaturum, quæ tunc in Academia Vuitebergen-
si vigeat, & quam profitebantur illi, quorum auctoritate Acade-
mia illa fundata, & priuilegiis ornata fuerat, qui erat Pontifex Ro-
manus, Imperator, & Fridericus Elector. Quà fronte igitur postea
Doctorem suis nouitatibus obtendit: cum Doctoreatu accepto,
non acceperit aliam potestatem, quam defendendi eam doctrinam,
quam tunc ipse Lutherus pro orthodoxa reputabat. Igitur, quoties
Lutherus pro nouitate sua Doctorem suum producit, toties peri-
urii abs se commissi argumentum producit. Neque enim per Do-
ctorem, vt iam non semel dictum, Lutherò facta fuit potestas,
quidlibet dicendi & docendi: sed illud duntaxat, quod à maioribus
acceperat: quodq; tunc ipsius Lutheri iudicio, rectum ac ortho-
doxum erat.

6. Si Doctoratus est legitimæ vocationis ad ministeria Eccle-
siastica argumentum; sequitur Diabolos astutiores & argutiores le-
gitime vocatos esse ad ministeria Ecclesiæ Lutheranæ: quia, vt heri
ex Lu-

ex Luthero audiuius, sunt Doctores Theologiæ. *Est autem Doct.*
ratus certum testimonium vocationis ad ministerium, vt ait Lutheranus
 Prædicans Hutterus: & vult, vt hoc bene notetur. Diaboli igitur, qui
 sunt Theologiæ Doctores, Prædicantium munere funguntur, vel
 certè fungi possunt, hoc est, concionari, baptizare, & cænam co-
 quere possunt; cum quibus epulentur Lutherani quandiu, & quan-
 tum volent: qui integræ mentis est; is cum his conuiuatoribus nec
 grandebit, nec cænabit.

Porro perquam ridiculum, quod Hutterus dicit: *Promotiones*
Doctores Theologorum, nihil aliud esse, quàm commendationem publicam
ministerii Evangelici secundum ritum Apostolicum. Quid audio Prædi-
 cans? Num his ritibus & cæremoniis, quibus vtimur in creatione
 Doctorem, utebantur Apostoli in ordinatione, & chirotonia mi-
 nistrorum Ecclesiæ? Num pileo, num epomide, num annulo ex-
 ornabant Candidatos Ecclesiastici ministerii? num cingulo cinge-
 bant? num in cathedra Doctorali collocabant? In Actibus Aposto-
 licis cap. 13. describitur ordinatio Sauli, seu Pauli, & Barnabæ A-
 postolorum. nec vestigium, nec vucula ibi de his nostris cæremoniis
 apparet. Quid ergo? *Tunc ieiunantes, & orantes, imponentesq; eis manus,*
dimiserunt illos. Vbi in institutione Doctoris impositio manuum?
 Imò vbi & apud sectarios in promotione Doctorali? Hutterus cer-
 tè præter sessionem in cathedra, librum, pileum, annulum, comple-
 xum & osculum, & denique votum, nihil ceremoniarum adducit:
 nec impositionis manuum vel verbulo meminit.

Magis adhuc ridiculus est alius Lutheranus Prædicans, Georg-
 ius Maior, cuius nugæ verbatim exscripsit Hutterus; qui in Do-
 ctoralis quadam inauguratione Vuitebergæ Anno M. D. L X. cele-
 brata, ineptissimè affirmat; *istas Academicas cæremonias in veteri testa-*
mento diuinitus institutas, & postea ab Apostolis aliquas cum ministerium
Verbi quibusdam commendandum esset, seruatas esse. Nam quod Moyses
 fratri suo Aaroni mitram imposuit, quid hoc ad pileum Doctora-
 lem? Et in consecratione ac ordinatione Pauli, & Barnabæ ieiuna-
 tum, & oratum est; adhibitaq; manuum impositio, vt paulò antè
 vidimus. Num idem in creatione Doctorem faciunt sectarii? Ne-
 quaquam: licet Maior, & cum illo Hutterus, intrepidè mentiantur:
Hunc ritum Apostolicum & nos in talibus congressibus seruamus. Quælo,
 num pridie ieiunant Lutherani, quando postridie Doctorem cre-
 ant? Forasan ipso promotionis die ieiunium indicunt, & inedia se
 macerant.

At nunc

At nunc abiungo; licet multa alia de hac Lutheri, & Prædicationis stultitia in Doctōratu pro legitimæ vocationis symbolo venditando dici possent. Sed hæc sufficiant: ex quibus perspicuè quivis intelligens intelliget, Lutherum cum suo Doctōratu, quo carebat, impostoris partes egisse. Et, ut maximè adhuc Doctōratu præditus fuisset; prorsus tamen fatuè, legitimam suam vocationem ex Doctōralibus stemmatis probare contendisse: licet inconstantissimè modò hoc, modò illud effutiuerit, nam in Psalmum 32. ita scribit: *Etiam si non essem Doctōr, tamen sum concionator, legitimè vocatus, & debui docere meam Ecclesiam.* Et tamen alibitotum fundum & fundamentum suæ vocationis in Doctōratu constituit. Hic clamat: licet Doctōr non essem: legitima nihilominus vocatione non destituerer. Qua de causa? Quia Vuitebergenses iusserunt, ut apud ipsos concionatorem agerem. Si hæc est legitima vocatio: legitimè ergò vocatus Carolstadius annunciauit quintum Euangelium Orlamundensibus, & Zuvinglius Tigurinis, & Calvinus Geneuensibus. quia, omnes isti ab Urbium illarum magistratibus iussi, & conducti in clamatorium ambonem ascenderunt, & inde populo hæreticam pestilentiam inspirarunt.

Nunc ad Candidatum nostrum me recipio: quem volens, libensque creabo Doctorem siue sacræ scripturæ, siue scholasticæ Theologiæ, siue sententiarum. Nam vnus, idemque Doctōratus & Doctōr his vocabulis significatur: Et Lutherus solitam, scophantix artem factitauit, cum in libro de Reformatione Reipublicæ Doctōratum & Doctorem sacræ scripturæ; Doctōratumque & Doctorem sententiarum, seu scholasticæ Theologiæ, tanquam diuersos distinxit. Est autem Candidatus noster hoc honoris gradu & titulo dignissimus: tum, quia tempus Theologico cursui decurrendo, & consummando præstitutum non modò expleuit, sed & longè transcendit: nam septennium integrum in diuina Theologiæ scientia posuit; partim Posnanix in Polonia; partim Moguntix, partim in Academia Dilingana, partim in hac nostra: tum, quia in Theologia insignes progressus fecit; quos anno superiore Collegio nostro Theologico satis superque testatos reliquit, cum pro licentia Theologica seuerum examen duarum horarum subiit: & argumentis, quæ fermè ex difficillimis Theologiæ quæstionibus proponebantur, promptè, & expedite satisfecit. A quo tempore frequens Theologicis & Philosophicis disputationibus interfuit: & quoties occasio data est; perspicuè demonstrauit; se, eo honore, ad quem

capel-

capessendum Licentiam acceperat , perquam dignum esse. Et quia in Candidato huius tituli & gradus non solius eruditionis, sed & probitatis ratio habetur: hanc itidem egregiè noster Licentiatus præstitit. Vixit enim hîc, vt vno verbo dicam; *Ecclesiasticè*; hoc est, sobriè, piè, & iustè; & vt de D. Ioannis Baptistæ parentibus S. Lucas loquitur, *sine querela*. Age igitur, mi Domine candidate; præsta, quæ præstanda sunt: fac professionem fidei; sine qua ex Constitutione Pij IV. nulli ad vllum gradum Academicum aditus pater: & postmodum iura in illa capita, quæ tibi à Domino Notario prælegentur: Et mox exoptata Theologica Laurea te condecorabo.

FINIS ORATIONIS.

Hic Dominus Candidatus professionem fidei ex præscripto Pii IV. Pontif. Max. palàm fecit: & postmodum in capita sibi à Notario prælecta iuravit. Quibus peractis, publicè sequenti verborum formula Doctor creatus est.

CREATIO DOCTORALIS.

QVod igitur Deus Optimus Maximus ad diuini nominis sui gloriam, ad Ecclesiæ Catholicæ amplificationem; & ad Christianæ Reipublicæ, præsertim latissimi & potentissimi Regni Poloniæ, vtilitatem multò maximam feliciter euenire velit: Ego *JACOBVS GRETSERVS* sacre Theologiæ Doctor, & Professor, potestate mihi ab amplissimo Collegio Theologico facta; te *MARTINVM MORESCIVM*, iam antea Theologiæ Licentiatum, nunc eiusdem sacrosanctæ Theologiæ Doctorem creo, creatumq; in hoc doctissimorum hominum confessu palàm pronuncio, dans tibi

D

omnia

26 omnia iura, & priuilegia, quæ huic honoris
gradu à summis Pontificibus, Imperatori-
bus, & Regibus concessa sunt: In nomine
sacrosanctæ, & indiuiduæ Trinitatis, Patris,
& Filii, & Spiritus sancti.

ACCLAMATIONES QVATV-
OR EPHEBORVM, ANGELICO SCHE-
mate ac vestitu nouo Doctori nouam dignitatem gra-
tulantium.

Angelus I. cum Codice.

Huic thesaurus in est doctrina plurimus. Idem.

Conditus his vinclis, vilitate caret.

Vincula deme libro: quæ condit, condito mente:

Protinus à labris GRATIA multa fluet.

Ergo agè THESAURI CHARISTES, CLARISSIME DO-

Quas ARS ingenio condidit, atq; LABOS;

(CTOR.

In vulgus deprome libens, turmamq; fidelem.

Dimidium cblamydis sic dabis ipse tua:

Angelus II. cum ferto aureo, &
gemma.

Nec litur hac gemmis, auroq; cornusca CORONA:

Vertice duplicibus proradiatq; notis.

Sic, ubi VIRTÛTI iungit SAPIENTIA sese:

Hinc animo geminus surgit, & ardet honos:

HOC AVRVM emineat fronti: splendet ab ore

DOCTORIS sacri nobilis ISTE LAPIS.

Nec longum tellus hunc cali HERO A tenebit.

VIRTVS & SOPHIÆ mox super astra rehent:

Angelus III. cum faculis.

Est fatuus ignis picta, ficta FALSITAS:

Falsoq; fulgore emicat.

Hæreses.

Hæreses isthunc pestis Erebo protulit:

Erebiq; ductu ventilat.

LUX VERITATIS viribus constat suis:

Consorti PATRI est LUMINVM.

ECCLESIE ô **CLARVMIVBAR**, *claram hanc FACEM*

In castra PERFIDIE iace.

MARTINVS ipse **PRÆSVL** *auspicio præt,*

Sequere alacer tantum DVCEM.

Angelus III. item cum faculis.

Fax lucet omnis, ardet vna, dum micat.

Sua publici & iuris facit.

MAGISTER ille, **DOCTOR** & **GENTILIUM**.

Eiusmodi fulsit FACE.

Nam dogma CHRISTI lucidum, & vite decus

Docuit ut ORE, ita MORIBVS.

PAVLINA **FAX** hæc, **DOCTOR** ô **CLARISSIMVS**

Tibi niteat vsq;, & ardeat.

Post prælium; succedet amplum præmium;

Perennitas VICTORIÆ.

Ritus inaugurationis.

Restat, Clarissime Domine Doctor, ut qui te Doctorem feci:
Doctorea itidem insignia tribuam.

Traditio libri.

Ante omnia autem librum tibi trado. Si te fecissem militem, gladium, & baltheum traderem. Nunc, cum te Doctorem creauerim: par est, ut, qui Doctorem maximè decet, librum à me accipias. Et primò quidem clausum, quia, si, ut quidam Veterum dixit; turpe est, senem ex commentario tantum sapere: quanto turpius erit Doctorem Theologiæ, nil memoriter scire, nec quidquam vel oppugnare, vel propugnare posse, nisi semper librum apertum ante se habeat.

Deinde, eundem librum tibi trado apertum. Cur apertum?

D 2

Nolo

28 Nolo causam à me audias. Audias à S. Paulo, nam quod suo Timotheo olim dixit; hoc tibi hodie dictum existima. Attende lectioni, 1. Tim. 4. exhortationi, doctrinæ. *Hæc meditare, in his esto; ut profectus tuus manifestus sit omnibus. Attende tibi, & doctrina. Insta in illis. Hoc enim faciens, & teipsum saluum facies, & eos, qui te audiunt.*

Epomis & pileus.

SECUNDò, Epomide Doctorali te vestio, & simul inuestio; & hac inuestitura, non cæremoniali, sed vera, & reali, possessionem rei beneficiariæ, hoc est, Theologiæ, tibi trado. Insuper, ad maiorem inuestituræ huius confirmationem, pileum eiusdem cærulei coloris, capiti tuo impono. Inuestiebant olim Germani nostri suos scipione, seu fuste; nunc gladio & vexillo: Angli olim, galea vel cornu, vel cratere, vel calcari, vel strigili, vel arcu, vel sagitta. Doctoralis inuestitura Epomide, & pileo iure perficitur.

Annulus.

PRÆterea annulo manum tuam insignio; quo Theologiam tibi despondeo, & connubio stabili iungo, propriamque dico: Tu, caue, libellum repudij mittas; & præstantissimam sponfam suas sibi res habere iubeas. Quin potius, cum sapientissimo illo Rege dicito: *Hanc amavi, & exquisivi eam à iuuentute mea, & quasi sui sponfam mihi eam assumere, & amator factus sum formæ illius.*

Cingulum.

AD hæc cingulo tecingo. Cinctum esse oportet Theologum; non laxum, non solum, multò minus dissolutum. Cinctum esse oportet Theologum: quia, miles est: cui in procinctu semper standum, hac præsertim ætate nostra, quâ tot veræ religionis oppugnatores quotidie ex Orco ebulliunt.

Dextra, amplexus, sessio in cathedra.

Nunc dextram tibi porrigo in signum non intermorituri amoris, & nunquam desituræ benevolentix: Teque nouum Doctorem hoc amplexu saluere: ac tandem in hac Doctorali cathedra mecum sedere iubeo: Et hoc honestissimo inthronismo tibi ius
Doctora-

Votum.

TAndem, DE V M ex animo precor, ac veneror, vt hunc dignitatis gradum, & honorem, tibi, ac inclytæ patriæ tuæ, regno inuictissimo, & Christianitatis propugnaculo, fortunare velit. Volet autem, si tu velis: hoc est, si in patriam regressus, labores potius, quàm beneficia Ecclesiastica quæras. Nescio enim quis malus genius Doctores nostros impellat, vt cum Poëta illo cantent: *quærenda pecunia primum, post virtus, & religio.* Imò, ô Doctores Theologi; quærite primum regnum DEI: resistite Diabolo, & copiis eius, Hæreticis: & cætera omnia adiicientur vobis.

Superest, Clarissime Domine Doctor, vt dum Doctoralia munuscula Dominis Professoribus distribuuntur; auditorium aliqua quæstiuncula detineas.

QVÆSTIO, DE ÆQVITATE IVRAMENTORVM, QVÆ CANDIDATVS PRÆSTARE DEBET.

Libenter parebo iussis tuis admodum Reuerende Domine Promotor. Non longè abibo: Materiam ex Academia, in qua sumus, & ex Doctorali inauguratione accipiam.

Candidatis non modò Theologiæ, sed & Iurisprudentiæ, Medicinæ, & Philosophiæ proponuntur varia capita, in quæ, tacto digitis Academico sceptro, iurare iubentur. De quibus meritò perconteris num rectæ rationi ac æquitati consonent. Nam, vt quædam sint leuia, & obseruatu facilia: alia tamen satis videntur grauiæ, & obseruatu difficilia. Facile forsan est, Professoribus eius Collègij, à quo lauream acceperisti; honorem & reuerentiam exhibere; & commodis Facultatis, ad quodcunque vitæ genus perueneris, fauere; ac benè velle: at arduum est, si neutrum horum feceris, periurij crimine obstringi; & in mortiferum peccatum incurrere. Facile est, vltra tria millia Turonensium in Doctorali solennitate non expendere: at difficile est, si hanc summam à Pontifice præfinitam transcendas, lethali scelere inquinari. Difficile item est, ipsis graduum Academicorū collatoribus & distributoribus, si hoc iura-

mentum à Candidatis non exigant, per sex menses à collatione Magisterij suspendi, etiamsi Pontificali dignitate præfulgeant: hoc est, licet sint Episcopi, vel Archiepiscopi.

Quàm item graue illud, cùm Licentiæ Candidatus iurat, caput suum Doctorali corona cinctum non iri, nisi illa in Academia, à qua Licentiam supremæ in Theologia laureæ capeßendæ accepit. Quid aget, si nulla vnquam ad illam Academiam regrediendi occasio offeratur? Quid, si centum, ducentis, & pluribus milliaribus distet? Quid, si nec vires, nec impensæ ad tantum iter emetendum suppetant? Num propterea periurus erit; si alia in Academia Doctorem se creari patiatur: præcipuè, quando offertur conditio, vel beneficium Ecclesiasticum, cuius absque Doctoratu non sit capax? quodque interea præteruolet, si iam demùm nuncium expedire, & ab Academia longissimè distita iuramenti relaxationem postulare velis.

Illud item non caret difficultate, gradum, quo semel donatus es, in alia Academia non resumere. Quarundam enim Academicarum, forsan & Ecclesiarum, hæc est consuetudo, vt neminem ad functionem scholasticam, vel Ecclesiasticam admittant; nisi certis in Academiis ad Magisterij, vel Doctoratus gradum prouectus fuerit. Quo casu, an periurus erit, qui Magisterium, vel Doctoratum resumet, vt Ecclesiæ, & Reipublicæ operam nauare queat?

Denique iuratur à Docturæ Candidato certa ætas. Quid opus hoc iuramento? An ætas Doctorem, vel aptum ad lauream Doctoralem efficit? Longè liberaliores sunt Baldus, & alij Doctores Iuris, qui concedunt, aliquem ANNO XVII. ætatis creari posse Doctorem. Et Angelus de Perusio, anno ætatis 23. accepit gradum, & cœpit publicè Iurisprudentiam profiteri: & frater eius Baldus anno 17. ætatis suæ repetiit Legem; *Centum Capua, ff. de eo, quod certo loco dari oportet*: Et Bartholus anno 21. ætatis Doctorali dignitate insignitus est. Et nos Theologi vsque ad annum trigésimum, hoc est, prope modum vsque ad canitiem expectare cogimur: & nisi nobiscum dispensetur, propter horum, & similium transgressionem, mortali flagitio nos contaminabimus, hoc est, ad inferos amandabimur?

Hæc dixerim, non, vt assertor; sed vt veritatis indagator, quam, vt spero, tu R. P. *Christophore Stebori*, Collegij Philosophici Decane spectabilis, tua eruditione in lucem promes, toti quæ auditorio spectandam propones: illud quæ potissimum declaratum dabis, num

bis, num mortaliter peccet, qui, quomodocunque Academicum iuramentum violat. 31

R E S P O N S I O.

R. P. Christophori Steborij Societ. I E S V, Philosophiæ Professoris, & facultatis philosophicæ Decani.

A D

QVÆSTIONEM DE IVRA-
MENTIS ACADEMICIS.

Reuerende, Nobilis, & Clarissime Domine Doctor, supremam Doctoreæ dignitatis lauream recens tuo capiti à Regina scientiarum Theologia impositam, ex animo tibi gratulor, precorquæ, & opto amplissimi istius honoris tui ornamenta, & titulos eruditioni tuæ, ac virtuti pridem debitos in diuini Numinis gloriam, Ecclesiæ orthodoxæ, ac gentis tuæ emolumentum feliciter euenire.

Quod verò tuum super Academicorum iuramentorum obligatione, & æquitate iudicium taces, meum expetis, præbestu quidem *Reuerende & Clarissime Doctor*, animi submissi, & modestiæ tuæ luculentum indicium, meis autem humeris onus iniicis permolestū, quibus magnopere vereor, ne sub eo, in hac nobilissima doctissimorum hominum frequentia succumbant. Verū, ne lætissimum, & faustissimum honoribus tuis diem istum mea trepidatione obnubilem, accedo ad positæ quæstionis elucidationem, & dico: à nemine meritò dubitari posse, quin iuramenta, quæ ab honorum Academicorum Candidatis pro veteri, & laudabili omnium Academicorum consuetudine exiguntur, æquissima sint. Quid enim, vt tuo progrediar ordine, æquius, quàm vt Academia, & Facultas à Candidato suo, quem tantis honoribus cumulat, reuerentiam, obseruantiam, & amorem antidoti loco postulet? Quid rationi magis consentaneum esse potest, quàm vt discipulus suos Doctores, Magistros, & Promotores ad Academicos titulos, veneretur, & colat? Atque vt alia, quæ ex Gentilium, & nostrorum scriptis produci in medium possent, silentio præteream, mira sunt, quæ de discipulorum apud Iudæos in Rabbinos suos obseruantia, & reuerentia literis consignata legimus: mira profectò sunt, & quæ ruborem Christianis incutere possunt. Gnome est apud illos: *Qui Mechebero, id est, à socio suo caput vnum, aut lectionem vnā, aut versum vnum, aut verbum vnum discit, tenetur illi honorem deferre.* Quantò magis ergò illis honor est habendus, à quibus integras scientias haurimus, earumq; insignia:

insignia & stemmata accipimus? Eorundem Hebræorum hæc item sunt monita, quæ ad maiorem fidem verbatim ferè refero. I. *Domus tua sit domus, in qua congregentur sacerdotes.* II. *Te ipsum pulveriza in pedum illorum pulvere; seu fac, ut ad eorum pedes, ac vestigia totus adhareas, etiamsi pulvere illa inquinata sint, tuq; similiter inquineris.* III. *Eorundem verba bibe cum sis;* cupidè scilicet, ac studiosè. IV. *Audiebant discipuli Magistros magno silentio, sic, ut in schola ne sternerenti quidem salus optaretur.* V. *Ad Magistrorum pedes ferè sedebant: exemplo est Doctor gentium S. Paulus, secus pedes Gamalielis eruditus iuxta veritatem paternæ legis Actuum 22.* VI. *Aliqui etiam in pavimento proiecti legebant.* VII. *Si quando coram Rabbino stabant, longius ab eo, reuerentiæ causa, stabant. Assurgendum, inquiunt Thalmudici, Magistro quàm longè videri potest. Quicoram Magistro suo non stat, impius vocatur, & vitam suam curtat, & Thalmudis obliuiscitur.*

Tandem, si quid scitu dignum, quod à præceptore accepissent, postea alicubi recitarent: ad huius auctoritatem cum honorifica nominis præfatione, id libenter referebant: laudaturq; ille discipulus, qui suum Præceptorem sapientem facit; qui bonam eius famam tuetur, ac firmat: qui dicit aliquid in illius, qui ipsi quandoque dixit; *En didicisti, nomine: Quicumque dixerit aliquid in eius, qui hoc dixit, seu olim docuit, nomine, is in mundum redemptionem adducit: quia scilicet quidam quasi mundi redemptor est, & à pessimo ingratitudinis malo saluator & vindex.* Vocant eum *Epicurum*, qui dicit; Magistri; non autem, Magistri nostri: & talis nunquam habebit partem in futuro seculo. Alij eum vocant *Epicurum*, qui ante Magistrum sedet; vel, si Magistrum citat, eum simpliciter citat, cum dicere debeat: *Hoc, & illud dicit Dominus meus: vel denique ipsum proprio nomine suo solo appellat.* Ista monent Hebræi. Sed accipite etiam horrendum illud, quod B. Hieronymus in S. Hilarione de Adriano quodam refert: qui, cum Magistrum suum despiceret, morbo regio correptus miserè interiit. Atque ex his eorum ingratitudinem æstimate, qui infrunito, & irreuerenti sunt ergà Magistros suos, & Promotores animo.

Sequitur alterum caput in quod iurari solet à Candidatis, sanctio videlicet Clementinæ tertiæ de Magistris, ne ultra tria millia Turonensium in Doctoratu recipiendo insumatur. Imò Benedictus XII. Religiosis magistralia insignia capeissentibus tantum non concedit; sed us peculiari constitutione vetuit, ne ultra duo millia

Turonensi-

Turonensium argenteorum expenderent. *Æquissima constitutio.* quia immodicos sumptus, & impensas nimium magnas prohibet: & obseruatu est facillima: quando plerique ita ferè natura comparati sunt, vt cum nummi sunt expendendi, quàm diligentissimè meminertint illorum axiomatum: *Entia nolunt malè disponi, frustra multiplicantur entia; quod potest fieri per pauciora, non debet fieri per plura.* Nee video vllam difficultatē in pœna vitanda, quæ decreta est illis, qui iuramentum hoc à candidatis non exigunt.

At difficile seruatu est, quod ante Licentiam iuratur, vt Doctoralis gradus alibi non suscipiatur, quàm eo in loco, in quo quis Licentiam accepit: Fateor equidem. Sed num ideo etiam iniquum? Minimè gentium. quid enim magis cum æquitate coniunctum, quàm vt illa Academia, illa Facultas, quæ primatibi ad Doctoream lauream aditum patetecit, eandem ad coronidem vsque perficiat? sed obstat, inquis, impedimentum. Pete ab Academia iuratæ obligationis remissionem. At nimis seruum est. Tarditati tuæ illud imputa, non iuramenti iniquitati. Cur tam diu distulisti? Illud certum: nullum vnquam virum grauem, cui honor DEI, animæque salus curæ est, contra hoc suum iuramentum facturum.

Iam verò quod ad iuramentum de gradibus non repetendis attinet; quis non videt, æquissimo iure illud à Candidatis exigî? nam gradum semel susceptum alicubi iterare, aliud non est, quam Academix illius, à qua quis promotus erat, iura, priuilegiaq; conuellere. Etenim dum honoris suscepti insignia alibi recipiuntur, tacite illa, imò expressè etiam insimulatur, tanquam potestate huiusmodi insignia largiendi careat, idq; quod agit, contra ius, fasque agat.

Accedit etiam illud, quod huiusmodi iuramento occurritur inuidiæ, & odii flammæ: qua interdum antiquiores Academix aduersus recentiores flagrant: cum illas pro legitimis Academiis agnoscere, Magistrosque, & Doctores earum pro veris, & genuinis Doctoribus recipere abnuunt. Quin etiam contingere solet, vt eiusmodi gradus in contemptum, & veræ religionis detestationem resumantur. Qua causa impulsus Petrus Martyr. Oxonii in Anglia Caluiniano ritu Doctor creari denuo voluit, licet iam olim Doctor in Italia creatus esset, cum Catholicam fidem, & monasticam vitam adhuc profiteretur. Ita non satis erat infami, & infelici pseudomartyri triplicis voti vincula sædè fregisse, & fidei auxilium iurandum toties repetitum impiè violasse, nisi etiam Academici iu-

ramenti transgressor periurus fieret: iuxta illud Apocalypsis; *qui in sordibus est, sordescat adhuc.*

Iuratur etiam à Theologiæ Licentiatīs triginta annorum ætas: Et rectissimè. nam, quidquid sit de aliarum Facultatum Doctōribus, certè grandior & grauior ætas Theologiæ Doctōrem cum primis decet: tum propter diuinissimæ scientiæ dignitatem; tum propter officij, & muneris amplitudinem. Credo sapientissimos Maiores nostros causam huius iuramenti desumpsisse ab exemplo Christi Domini, qui, licet ab æterno Patre, iustitiæ nobis Doctōr datus, & designatus esset; ipse tamen ante trigessimum ætatis annum, tantum munus noluit exercere.

Nimis longus essem, si omnium iuramentorum æquitatem sigillatim explicandam susciperem. Verbo dico: nisi omnia, & singula iustissima essent, nunquam ea à totius orbis Catholici celeberrimis Academicis in mores recepta fuissent.

Ad extremum, quod maximè queritur; Vtrum omnis violatio deliberata alicuius iuramenti Academici, quod ante inaugurationem à Candidatis ad sceptrum Academicum, vel manum Magnifici Rectoris fieri solet, lethale crimen sit, respondeo affirmatè: & probo responsum. quia, omne iuramentum promissorium legitimè factum in fauorem alterius, obligat sub lethali peccato promittentem; nisi alter, in cuius fauorem iuratur, relaxet, aut condonet obligationem: Atqui ista iuramenta Academica eiusmodi sunt, vt ex formula eorum liquet: Igitur dubitari nulla ratione debet; quin eorum transgressio sit lethale peccatum; & quidem infame periurij crimen; quod non pauci, nec ignobiles Doctores ipso homicidio grauius esse affirmant. Et quemadmodum, si quis eò impietatis deuolueretur, vt DEVM Opt. Max. non vereretur furti alicuius perpetrandi, vel homicidij socium, & auxiliatorem implorare; atroci ipsum iniuria, se verò immani blasphemiæ scelere obstringeret: eò quod affectu suo, quantum in se est, DEVM furti auctorem, vel homicidam efficere anniteretur: ita nec minorem DEO iniuriam, nec leuiorem animæ suæ noxam inferre censendus est; qui iuramentum violando, quantum in se est, DEVM falsi testem, & mendacij architectum constituit. Nam iuramento quidpiam promittere aliud non est, quàm inuocare DEVM testem, & quod anumum habeas faciendi, quod promittis, & quod re ipsa, quod promissisti, factururus sis, cum poteris, & opus erit: quorum si vel alterum, vel vtrumque abest, DEVS mendacij; & falsitatis attestator efficitur.

Scio,

Scio, non neminem, qui violatum iuramentum in re leuitantum veniale peccatum autumat: sed, non ita esse videtur. Neque enim iuramentum in materiæ quantitatem fertur; sed, rei iuraturæ veritatem respicit. Veritas autem in ordine ad diuinum testimonium eiusdem rationis est: atque perinde iniuriosum, & blasphemum DEO est, in re parua, atque in maxima fallum testari, & mendacem esse.

Neque tamen ex dictis colligas lethali crimini subiaccere eum, qui, cum mille aureos promiserit, in solutione obolum omittet. Censetur enim is, cui promissio facta est, ita paruam rem non curare, & oboli obligationem remittere. Estque ea promissorii iuramenti conditio, vt obligare cesset, cum alter, in cuius fauorem commissum est, tacite, vel expresse condonat, & remittit obligationem: quod tamen vniuersum de Academicis iuramentis nemo prudens iudicabit, aut asseret. Nisi enim Academia sua sibi promissa à Candidatis iuramento obfirmata vellet præstari, frustra certè his tam conceptis verbis eos ad iusiurandum impelleret: *QVILIBET ad manum Magnifici Rectoris dicat; Ego iuro. Quilibet ad sceptrum dicat; iuro.* Conclusum igitur esto, id, quod spiritus sanctus pridem docuit: Ecclesiastici 23: *Vir multum iurans, implebitur iniquitate: & non discedet à domo illius plaga: Et, si frustrauerit; delictum illius super ipsum erit: & si dissimulauerit, delinquit dupliciter: & si in vacuum iurauerit, non iustificabitur: replebitur enim retributione domus illius.*

GRATIÆ.

II, qui gratias non agunt pro beneficiis, magno Persarū Regi Artaxerxi, humanitatis in se iura violare videntur. Nec contenti sunt, inquit, *gratias non agere beneficiis, & humanitatis in se iura violare.* Proinde, vt humanitatis huic iuri pro tot beneficiis receptis, morem geramus: Tibi cum primis DEVS Ter Opt. Max. gratias referimus pro tot gratiis: quas nisi in dies, vel potius in momenta ministrasses, ad hoc studiorum meorum columen nunquam peruenissem: da porro hanc vnam, sed magnam, necessariamque gratiam, vt labores de hinc mei, & vita consequens, in tuam maiorem gloriam, & Ecclesiæ tuæ Catholice vsum cedant & succedant. Vobis deinde, D. VIRGO Deipara extra ordinem, aliisque Beatis Cælitibus, pro multo vestro præsidio, & subsidio, quæ passim expertus sum, & vti

spero, dehinc experiar gratum animum deferō, atque offero, votisq̃ue omnibus expeto, & recipio, vt vestram de hinc hyperdulam, & dulam contra hæreseon latratus tucar, & profligem pro viribus.

Sed quas reponam gratias tibi Reuerende, & Magnifice Dñe Rector, cæteriꝫ de facultate Theologica vel Professores, vel Præceptores mei colendissimi, & cum primis tibi R. P. *GRETSERE*, Decane spectabilis & Promotor exoptatissime: quas, inquam, pro tot vestris in me, quanquam immerentem, meritis redhibeam gratias: Id vnum consilium suppetit, vt hæc vestra tot, & ampla beneficia, imo pectori altius inscribam & cælem: vt, quantumuis absens, vbi vbi occasio aliqua fuerit, gratus in vos animus, vt præsentem, supat.

Deniq; R. Reuerendis, & Clariss. DD. facultatis cuiusuis, & Academiæ huius Patribus, luminibus, & Professoribus; dein Illustrissimo Marchioni, aliis etiam Illustribus & Generosis Comitibus, & Baronibus; cæteris etiam nobilitate, virtute, doctrina conspicuis auditoribus pro præsentia, beneuolentia, & attentione summa, summas etiam grates referimus.

F I N I S.

